

Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allanngortinneqarnerat pillugit inatsisip (Malersuineq akiorniarlugu suliniutit patajaallisaavigineqarnerat, kinaassutsimik atornerluinerup pinerluutinngortinneqarnera aamma unnerluussuteqarnissamut piffissaliussap unitsinneqarnera il.il.) pillugu missingiutip Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuutip aamma Qanilleqqusinnginneq, najugaqataasinnaannginneq aamma anisitsisarneq pillugit inatsisip allanngortinneqarnera pillugu inatsisip assigiinngitsut Kalaallit Nunaannut atuutilersinneqarnissaat pillugu peqqussutissamut missingiut

(Inuussutissarsiornermut, Niuernermut, Aatsitassanut, Inatsisip Atuutsinneqarnerannut Naligiissitaanermullu Naalakkersuisoq)

Saqqummiussissut

(Inuussutissarsiornermut, Niuernermut, Aatsitassanut, Inatsisip Atuutsinneqarnerannut Naligiissitaanermullu Naalakkersuisoq)

Siullermeerneqarnera

Malersuinerneq suliniutit patajaallisaavigineqarnissaat, kinaassutsimik atornerluinerup pinerluutinngortinneqarnissaa aamma eqqartuussisutigoortumik suliarinninnissaq aalajangiinissarlu pillugit alloriarnissamik suliaqartoqarsimangippat, akiliisitsissutinik suliani unnerluussuteqarnissamut piffissaliussap, ukiunik 2-nnik sivilisuseqartup, unitsinneqarnissaa pillugu malittarisassat piuminarnerulersinneqarnissaat inatsisissatut siunnersuutip kingunerissavai. Tamatuma saniatigut inunnut, pinerluttulerinermi inatsisip aamma eqqartuussisarnermik inatsisip malitsigisaanik napparsimavimmi paaqqinniffimmiluunniit inissinneqarsimasunut anisinnaatitaaneq il.il. pillugit malittarisassanik aalajangersaasinnaanissamut piginnaatitsinerit pisariaqartinneqartut inatsisissatut siunnersuutip pilersissavaa.

Systematiskiusumik attaveqarnissamut misiliinerit pissusilersornerillu arlallit, kissaatigineqanngitsut ataavartullu, aamma aarlerinartorsiortumut killissanik qaangiinertut qunusiarineqarnertullu misigineqartut, malersuinerneq pineqarput. Toqqissimasumik isumannaatsumillu inuuneqarnissamut pisinnaatitaanerup navianartorsiortinneqarneranik malersugaaneq kinguneqarpoq. Malersugaaneq annertoorujussuarmik tarnikkut artorsaatissiisarpoq aamma eqqunngitsuliorfigineqartunut ajornartorsiutinik anigorneqarsinnaanngitsunik – inooqatigiinnikkut, tarnikkut aningaasaqarnikkullu – sunniuteqartarpoq. Taamaammatt pinerluttulerinermi inatsimmi malersuineq pillugu aalajangersakkamik pinerluutinngortitsisumik ilanngussisoqarnissaa Naalakkersuisut 2023-imi Inatsiseqarnerneq ministereqarfimmu noqqaassutigaa.

Tamatuma peqatigisaanik qanilleqqusinnginneq pillugu utaqqiisaagallartumik aalajangiinermik nalunaarutiginninnerup (erngerluni qanilleqqusinnginnermik

taaneqartartup) periarfissanngortinnissaa eqqunneqassaaq, taassumalu politidirektørip qanilleqqusinnginnissaaq najugaqataasinnaannginnerluunniit pillugit aalajangiinissaata tungaanut, utaqqiisaagallartumik eqqunngitsuliorfigineqartoq aamma eqqunngitsuliorfigineqartoq inoqutigiinni inoqutigisaqarsimappat inoqutai illersussavaa.

Tamatuma saniatigut aalisarnermik inatsisiliornerni unioqutitsineq pillugu suliaq piviusoq tunngavigalugu, unnerluussuteqarnissamat piffissaliussap unitsinneqarsinnaanera pillugu malittarisassat piuminarsarneqarnissaat pisariaqartinneqartoq takuneqarsinnaalersimavoq, taamaalilluni akiliisitsissutit pillugit suliat, eqqartuussisutigoortumik suliarinninnissaaq aalajangiinissarlu pillugit alloriartoqarnissaanik suliarinnittoqarsimannginnera pissutigalugu, ukiut 2 qaangiunneranni pisoqalisuunnginniassammata.

Naggataagut pinerluttulerinermi inatsimmi aamma eqqartuussisarnermik inatsimmi piginnaatitsissutit pillugit aalajangersakkanik ilanngussisoqarnissaa pisariaqartinneqarpoq, taakkulu inunnut, pinerluttulerinermi inatsit malillugu tarnikkut napparsimasut napparsimaviannut imaluunniit paaqqinniffimmi allami inissinneqarnissamik eqqartuunneqarsimasunut, anisinnaatitaaneq pillugu nalunaarummik suliarinnittoqarnissaanut periarfissiissapput.

Ataatsimut isigalugu inatsisit atuutsinneqarnerannut suliaqarfirmi tamanut atugassiat qaffatsinneqarnissaat pillugit Naalakkersuisut suliaqarnerannut suliniutit ilaapput, taamaalluni suliaqarfik sunniuteqarluartuuniassammat ullutsinnullu naleqquttuulluni, aamma innuttaasut inatsisitigut naapertuulluortoqarneranik misiginninnerannut naapertuunniassammat.

Taamatut oqaaseqarlutik immikkoortoq Inatsisartuni suliarineqaqqullugu Naalakkersuisut tunniuppat.